

Siri Suara PAS di Parlimen - 4

MASYARAKAT 彭YAYANG YANG TERKONGKONG

MUHAMMAD BIN SABU

NASKHAH PEMERINTAHAN
PUSTAKAAN NEGARA MALAYSIA
10 AUG 1992

©Hakcipta Penerbit Terpelihara 1991

Mana-mana bahagian buku ini tidak boleh dihasilkan semula dalam apa jua bentuk tanpa terlebih dahulu mendapat keizinan daripada penerbit.

Cetakan Pertama: April 1991

M
324.2595P
MUH

diterbitkan oleh:

JABATAN PENERANGAN, PENYELIDIKAN DAN DAKWAH PAS PUSAT
28A, Jalan Pahang Barat, Off Jalan Pahang,
53000 Kuala Lumpur.

700635

Uruscetak oleh:

Syarikat Perniagaan Al-Hafiz
47 Jalan Raja Muda Abdul Aziz,
53000 Kuala Lumpur. Tel: 2921114

18 NOV. 1993

Perpustakaan Negara
Malaysia

PRAKATA PENERBIT

Dengan Nama Allah Yang Maha Pemurah
Lagi Maha Penyayang

TERNYATA kepetahan dan kepintaran Saudara Muhammad Sabu dalam berhujah dan berpidato tidak terhad sekadar di pentas-pentas ceramah umum di kampung dan desa sahaja. Setelah berlalu satu penggal Sidang Dewan Rakyat Malaysia, Saudara Muhammad Sabu yang menjadi anggota Dewan tersebut mewakili Parlimen Nilam Puri, Kelantan, terbukti menjadi antara ahli Parlimen yang paling banyak bangun memberikan ucapan-ucapannya.

Sebagai seorang pemimpin muda PAS yang sentiasa lantang menyuarakan kebenaran, Saudara Muhammad Sabu sentiasa mengiringkan hujah dan pandangan beliau dengan fakta-fakta dan bukti-bukti yang kukuh. Hal inilah yang menyebabkan para pemimpin Kerajaan agak sukar untuk mematahkan hujah-hujah yang beliau keluarkan.

Di atas kelantangan dan kekonkritan hujah dan pandangan beliau itulah, setiap kali Saudara Muhammad Sabu bangun berucap, dalam apa jua tajuk atau perkara, seluruh anggota Parlimen yang hadir, khususnya dari pihak Kerajaan memberikan perhatian serius.

Kami percaya para pembaca, khususnya ahli-ahli PAS, dan terlebih khusus lagi para pengundi Angkatan Perpaduan Ummah di kawasan Parlimen Nilam Puri, Kelantan, tentu sekali tidak mahu melepaskan peluang untuk mengikuti dan meneliti kebermasaan ucapan pemimpin muda mereka ini.

Atas kiraan itu, pihak kami telah mengusahakan penerbitan risalah kecil ini. Diharapkan ia dapat menjadi bahan bacaan umum masyarakat negara ini, terutama bagi mereka yang meminati perjuangan politik tanahair dan ingin memahami pandangan dan pendirian pihak yang memperjuangkan politik Islam, iaitu PAS.

Selain daripada itu, risalah kecil ini juga diharapkan akan menjadi suatu bahan rujukan berguna bagi para pengkaji politik tanahair, terutama di masa-masa mendatang.

Kepada Allah juga kami pohon panduan dan pertolongan dalam menjayakan usaha kami menerbitkan risalah-risalah berikutnya.

Wallahu Waalam Bissawab. Wa Ilaihil Marja'u Wal Maab.

MOHD. NASIR BIN AWANG

Bahagian Penerbitan Buku,

Jabatan Penerangan, Penyelidikan dan Dakwah PAS Pusat,

Kuala Lumpur.

11 April 1991.

ISI KANDUNGAN

Tunku: Juara Demokrasi Sebenar	1
Asas Islam Dalam Masyarakat Penyayang	5
Mempertingkat Teknologi Pertanian Negara	16
Lindungi Para Pengguna Dari sebarang Penipuan	21
Ke Arah Menjamin Keselamatan Negara	26
Pelajar Universiti Terkongkong dan Terhimpit	31
Antara Teluk Parsi dan Teluk Siam	35
Pertingkat Mutu Kawalan Keselamatan Negara	37
Imperialisme Media, Penjajahan Bentuk Baru	42
Menjamin Kedudukan Tanah-tanah Wakaf Islam	48
Hentikan Taktik Kotor Guna Jentera Kerajaan	52

Tunku: Juara Demokrasi Yang Sebenar

(Dewan Rakyat, 10.12.1990)

"BARANGSIAPA yang di akhir kalamnya menyebut kali-mah La ilaha illallah', maka seseorang itu bakal dimasukkan ke dalam syurga".

Kami daripada PAS merakamkan sokongan kepada Usul Takziah ke atas Yang Teramat Mulia Almarhum Tunku Abdul Rahman Putra Al-Haj dan juga isteri beliau Tun Sharifah Rodziah dan seluruh keluarganya.

Usul yang begini mulia, begini hebat sepatutnya semua Menteri Kabinet hendaklah berada dalam Dewan ini untuk mendengar ucapan-ucapan daripada semua yang mewakili rakyat jelata untuk kita membuat satu Usul Takziah kepada Yang Teramat Mulia Bapa Kemerdekaan kita Almarhum Tunku Abdul Rahman Putra Al-Haj.

Tanpa hipokrit, kami daripada PAS mengakui bahawa kami

berbeza pendapat sepanjang pemerintahan Tunku Abdul Rahman Putra Al-Haj kerana di waktu itu beliau sebagai Perdana Menteri, kami daripada PAS menjadi Pembangkang. Kami berbeza pandangan dan pendapat dengan beliau, terutama tafsiran-tafsiran mengenai Islam dan hukum hakam berkenaan dengan Islam. Tetapi kami tetap menghormati beliau sebagai seorang pemimpin negara dan seorang wira bangsa. Beliau adalah seorang juara demokrasi yang sebenarnya.

Kami amat gembira bila di akhir hayat beliau, Almarhum dapat bersama dengan kami. Bagi parti PAS, kami tidak lebih gembira melainkan apabila di akhir hayatnya, Almarhum menerima perjuangan Islam sebagai ad-Deen, Islam sebagai cara hidup dan beliau memperjuangkannya secara sungguh-sungguh. Itulah kegembiraan kami yang amat sangat.

Almarhum Tunku ialah seorang wira yang hidup dengan penuh perjuangan. Bermula daripada menjadi A.D.O. (Penolong Pegawai Daerah), kemudian menjadi D.O. (Pegawai Daerah), kemudian Menteri, kemudian menjadi Perdana Menteri. Malah perjuangannya tidak berakhir dengan menjadi Perdana Menteri. Apabila beliau tidak lagi menjadi Perdana Menteri, beliau meneruskan perjuangannya untuk menjadi juara membela hak asasi manusia.

Kita tidak menafikan bahawa ISA dibuat dan diluluskan di zaman Almarhum Tunku Abdul Rahman Putra Al-Haj menjadi Perdana Menteri. Tetapi di akhir hayat beliau, Almarhum menjadi juara menentang segala bentuk penindasan termasuk ISA itu sendiri.

Sekarang ini bapa pejuang demokrasi dan pejuang hak asasi manusia sudah tidak ada. Kami terutama mereka yang pernah merengkok di bawah ISA merasa amat bimbang. Saya sendiri yang sudah dua kali masuk ISA, dengan ketiadaan Almarhum Tunku merasa bimbang untuk hidup di Malaysia, jikalau pemimpin yang ada sekarang tidak mengikut jejak langkah ataupun mengenali sanubari apa yang diperjuangkan oleh Almarhum Tunku Abdul Rahman.

Sebagai seorang pejuang yang gigih, kita perlu mengucapkan tahniah Kepada Almarhum kerana beliau terus berjuang walaupun beliau berada di atas katil. Satu hari beliau berada di atas katil di Hospital Besar, Kuala Lumpur, setelah dimasukkan ke situ kerana uzur. Tetapi bila beliau dengar beliau dipanggil untuk memberi ceramah di Ampang, beliau meminta izin kepada doktor untuk keluar hanya untuk pergi memberi ceramah, memberi pandangan beliau terhadap Kerajaan, juga terhadap isu-isu antarabangsa. Selepas ceramah, beliau dibawa semula ke hospital dan beliau berehat semula di situ.

Inilah seorang pemimpin, yang bagi kita anak muda yang besar selepas merdeka patut mengambil contoh kerana beliau sehingga di atas katil di hospital masih lagi mengingat nasib rakyat dan mengingatkan segala apa yang beliau perjuangkan. Walaupun di saat matanya telahpun rabun dan telinganya pekak, di saat itu beliau berkawan dengan PAS. Walaupun pernah salah seorang Naib Presiden UMNO memperli kerana kami mengambil pandangan Almarhum Tunku semasa beliau sudah buta dan tuli, tetapi kami berbangga sebagai seorang Islam di akhir hayatnya, Almarhum banyak menyatakan hal Islam.

Dalam ceramah Almarhum Tunku Abdul Rahman Putra Al-Haj dengan saya di beberapa tempat di Kedah dan Perlis, beliau dengan lantang menyuarakan supaya semua bentuk judi perlu dihapuskan. Beliau juga menentang arak yang diminum oleh orang-orang Islam, terutama sekali di peringkat pemimpin-pemimpin.

Bagi kami daripada PAS, tidak lain yang kami lebih berbangga apabila seseorang itu berjuang di dalam perjuangan Islam, terutama sekali di akhir hayat hidupnya. Itulah yang menjadi contoh kepada kita sebab kita ingat apa yang berlaku kepada Nabi Muhammad SAW yang dikisahkan melalui sejarah iaitu Rasulullah SAW meminta Abu Talib mengucap dua kalimah syahadah di saat akhir hayatnya supaya dengan mengucap itu Abu Talib dapat dimasukkan ke dalam syurga. Kita mendengar khabar melalui akhbar-akhbar dan juga berita-berita yang disiarkan oleh pihak Kerajaan, Almarhum Tunku dapat mengucap kalimah '*La Ilaha Illallah*' di akhir hayat hidupnya.

Kita berdoa kepada Allah semoga beliau ditempatkan ke dalam syurga *Jannatun-Naim* di atas jasa beliau dan juga kesungguhan beliau untuk memperjuangkan Islam. Semoga Allah Yang Maha Mengetahui akan mengampun segala dosa yang dilakukan oleh Almarhum Tunku Abdul Rahman.

Dari itu kami daripada pihak PAS sekali lagi mengucapkan takziah dan menyokong Usul Takziah ini supaya dapat disampaikan kepada kaum keluarganya dan dengan ucapan ini juga kita bertekad untuk mengikuti jejak langkah beliau yang sanggup berjuang sehingga di saat akhir hayat beliau.

Asas Islam Dalam Masyarakat Penyayang

(Dewan Rakyat, 3.1.1991)

PEMBANGUNAN yang berorientasikan kebendaan semata-mata tidak akan melahirkan insan yang sempurna. Melahirkan insan yang *kamil* adalah lebih baik daripada melahirkan warganegara yang baik. Insan yang sempurna sesuai untuk hidup di mana-mana negara, tetapi warganegara yang baik belum tentu ia diterima di mana-mana.

Untuk membentuk masyarakat yang ikram, masyarakat penyayang, *sharing and caring society*, berbagai agama ada mempunyai doktrin dan cara tersendiri masing-masing. Dalam Islam, pembentukan satu masyarakat penyayang menjadi rukun yang utama. Sembahyang mengajar umat Islam untuk membentuk satu masyarakat dalam sebuah di rumah; dilettakkan bapa sebagai imam, isteri dan anak-anak sebagai makmum. Setiap lepas sembahyang pula kita disuruh berdoa untuk kesejahteraan kedua ibubapa, kerabat terdekat dan sekalian kaum muslimin dan manusia sejagat.

Asas sembahyang ini dilupakan oleh pemerintah untuk mewujudkan program kasih sayang. Program yang dihadiri oleh pemimpin Islam kadangkala tidak mempedulikan waktu sembahyang. Misalnya *Marathon* atau *Jogathon* dimulakan pada pukul 6.00 pagi. Sedangkan waktu itu azan berkumandang ke udara daripada masjid-masjid. Di waktu itulah tembakan pistol bermula untuk melepaskan anak-anak muda berlari di waktu Subuh.

Seseorang itu kalau malas sembahyang, ia adalah hal peribadi. Dosanya ditanggung sendiri. Tetapi janganlah malasnya sembahyang itu kerana ia dianjur oleh pemerintah sehingga melupai waktu sembahyang dan sebagainya.

Pertunjukan hiburan di Dataran Merdeka diadakan jam 8.00 malam. Pukul 6.30 petang ribuan umat Islam telah berkumpul sedangkan ketika itu belum lagi masuk waktu Maghrib. Laungan azan daripada Masjid Jamek yang terdekat dengan Dataran Merdeka seolah-olah memulakan satu pentas hiburan yang dimulakan hanya selepas maghrib dan mereka berkumpul sebelum Maghrib lagi.

Masyarakat menjadi hancur bila keburukan dan jenayah tidak dihukum, sebaliknya dipandang mulia. Skandal Video Vijandran cuba dilindungi oleh Peguam Negara dan *evidence* mahkamahnya telahpun dibakar hangus. Orang yang menyiksa isteri dan bertindak ganas *ala-gangster* diangkat menjadi pemimpin, bahkan ada juga terdapat Ahli Parlimen kini menyiksa suami dengan mengambil bomoh. Orang sebegini diangkat menjadi pemimpin kerana keburukan itu dilindungi dan kebaikan sudah tidak nampak lagi.

Penyanyi yang dua tiga kali ditangkap berkhalwat dan dibicarakan, diberi publisiti dan dipuja oleh RTM. Rakyat cuba didoktrinkan untuk melihat orang yang melakukan kejahanan itu sebagai baik, dan orang yang melakukan kebaikan itu sebagai jahat.

Penyanyi yang menghina Islam di New Zealand dan hendak disaman oleh masyarakat Islam di New Zealand kerana menghina Islam, lalu beliau pulang ke Malaysia, dia disanjung dipuja sehingga menjadi penyanyi pujaan dan penyanyi yang *top* sekarang ini. Segala perbuatannya dianggap sebagai membuat amal, sedangkan di New Zealand ia hendak disaman oleh masyarakat Islam.

Di New Zealand, menghina Islam adalah satu kesalahan. Tetapi di Malaysia ini orang yang menghina Islam dipuji-puja. Kalau Salman Rushdie menulis buku di Kuala Lumpur, barangkali ia tidak diapa-apakan. Tetapi di Barat, kebebasan mahkamah dan kebebasan beragama yang ada menyebabkan Salman Rushdie tidak hidup senang kerana ia menghina agama di bumi England.

Moral semakin runtuh, masyarakat menjadi semaki pincang, penagih dadah bertambah, rompakan bermaharajalela, berlaku berbagai peristiwa ngeri. Sekarang ini di negara kita Malaysia ini abang merogol adik, anak membunuh bapa, ayah merogol anak lalu divideokan dan dijual. Anak-anak disiksa tanpa belas kasihan. Jiwa kebinatangan menggantikan jiwa insan. Inilah penyakit masyarakat yang tumbuh selepas 33 tahun kita merdeka.

Sekarang konsep habuan benda diperkenalkan untuk mewujudkan masyarakat kasih-sayang. Pelepasan cukai di-beri untuk orang yang memelihara orang tua dan orang cacat, sedangkan kita rasa falsafah kehidupan dalam Islam lebih penting daripada habuan kebendaan. Sudah lama orang tua-tua di kampung memelihara ibubapa dan keluarga mereka yang tua dan sakit. Hidup keluarga desa penuh dengan kesiksaan ekonomi, tetapi orang tua mereka tetap mereka pelihara.

Lihat watak orang kampung yang dikisahkan dalam novel *Rentong* dan *Ranjau Sepanjang Jalan*, karangan Shahnon Ahmad. Bagaimana hidup masyarakat desa yang serba mis-kin, tetapi ibubapa tetap mereka pelihara. Memelihara ibubapa itu dikaitkan dengan agama; dengan syurga dan neraka. Dikaitkan bahawa ibu itu sebagai pelindung dan "syurga itu berada di bawah telapak kaki ibu".

Falsafah Islam perlu ditekankan semula untuk mewujudkan '*caring society*', masyarakat penyayang. Jangan sampai ke peringkat parah seperti apa yang berlaku di Amerika dan sesetengah negara Barat. Di sana ibubapa lebih suka memeli-ihara anjing daripada memelihara anaknya sendiri. Sebab anjing selepas 21 tahun dia pasti setia dengan tuannya. Kadangkala berlaku bila tuannya meninggal dunia, lalu anjing itu pergi ke kubur dan duduk di kubur itu sehingga mati.

Banyak pula berlaku di mana orang-orang tua di sana mewasi-atkan supaya anjing dikuburkan di sebelahnya, kerana ia lebih kasih memelihara anjing daripada memelihara anaknya sendiri. Sebab anaknya sendiri setelah berumur 18 atau 21 tahun,

mereka ini bebas keluar daripada rumah. Jikalau ibubapa mereka menahan daripada keluar, maka anak tersebut boleh membuat *court injunction* untuk menahan ibubapa mereka supaya jangan menghalang mereka keluar daripada rumah. Inilah masyarakat yang kita lihat wujud di negara Barat yang tidak perlu kita contohi.

Agama Islam mewajibkan supaya pemimpin terutama sekali menjadi contoh kepada umat. Ia menyuruh kita menjadi contoh yang terbaik kepada manusia, kepada ummah, kerana kita dianugerahkan agama yang memandu hidup kita.

Saya bergaul dengan orang Cina dan India, sama ada dari parti politik, pemimpin kesatuan sekerja atau rakyat biasa terutama sekali semasa saya berada dalam Kem Tahanan Kemunting. Saya bertanya mereka: "Kenapa kamu tidak dapat melihat kebaikan Islam?" Mereka berkata mereka tidak dapat melihat kebaikan Islam dan akhlak Islam pada para pemimpin negara yang beragama Islam. Sebab mereka lihat pemimpin-pemimpin kita penuh dengan skandal-skandal rasuah, skandal seks, akhlak yang rosak dan sebagainya. Ada antara mereka (bukan Islam) mencabar mengatakan: "Buat apa saya memeluk agama Islam, buat apa saya menghormati Islam, sedangkan akhlak saya lebih baik daripada akhlak pemimpin-pemimpin yang beragama Islam"?

Inilah yang menjadi penghalang kepada orang bukan Islam untuk melihat Islam. Akhlak pemimpin Islam tidak dapat dipamerkan untuk menjadi teladan kepada manusia di tengah-tengah masyarakat negara ini. Sebab itu Islam perlu diterjemahkan dalam akhlak yang mulia. Orang bukan Islam dapat

melihat dan menilai Islam dari perbuatan umat Islam terutamanya akhlak para pemimpin, sebab menurut hadith Rasulullah SAW: *"Rakyat akan mengikut agama pemimpin"*.

Kemudian kita lihat pula hasil daripada kepincangan masyarakat yang berlaku sekarang ini, berlakulah berbagai-bagai kes yang menyebabkan orang bukan Islam tidak dapat menghormati Islam. Contohnya kes yang berlaku kepada dunia antarabangsa iaitu perbicaraan antara Imelda Marcos (balu Mendiang Presiden Marcos) dengan Adnan Kashoggi (saudagar senjata berbangsa Arab/Islam) yang dituduh melesapkan wang beribu juta daripada Filipina. Selepas perbicaraan yang panjang, maka didapati Imelda Marcos dan Adnan Kashoggi tidak bersalah.

Bila kedua-duanya tidak bersalah, Imelda Marcos terus meluru ke gereja untuk berdoa dan bersyukur kepada tuhannya kerana kesnya diberi kemenangan. Tetapi Adnan Kashoggi pula pergi ke sebuah hotel lalu memanggil semua *girlfriend*nya di seluruh dunia, serta dijamu arak hingga ke pagi. Inilah akhlak pemimpin-pemimpin perniagaan atau pemimpin politik Islam yang kita lihat di mata dunia. Sedangkan kita hendak beritahu kepada orang bukan Islam, bahawa Islam itu baik. Bagaimana mungkin orang bukan Islam akan percaya jika akhlak pemimpin dipamerkan sedemikian rupa?

Masyarakat sedang menuju kehancuran. Kasih sayang bertukar menjadi kejam dan zalim. Penyiksaan kepada kanak-kanak semakin menjadi-jadi. Kes yang dilaporkan dan diberitahu oleh Kerajaan selalunya ditafsirkan satu daripada sepuluh. Ertinya setiap 10 kejadian, satu barangkali dilaporkan.

Kalau diambil satu yang dilaporkan daripada 10 (lihat jadual di bawah), maka bayangkan berapa ribu kes penyiksaan kanak-kanak yang sedang berlaku dalam masyarakat.

Tahun	Penyiksaan Kanak-kanak (kes)	Penyiksaan Isteri (kes)
1985	72	41
1986	171	29
1987	149	37
1988	191	-**
1989	276	56
1990	133*	-**

Perangkaan kes-kes penyiksaan kanak-kanak dan isteri di Malaysia dari tahun 1985 hingga 1990.

*sehingga bulan Mei sahaja ** tidak disertakan

Kegagalan rumahtangga sedemikian rupa juga memungkinkan berlaku penyiksaan terhadap isteri begitu hebat sekali (lihat jadual di atas). Serupa juga satu kes dianggap mewakili 10 yang tidak dilaporkan. Jenayah-jenayah seperti ini semakin menjadi-jadi kerana asas keharmonian dan pendidikan akhlak sekarang ini semakin dilupakan, terutama sekali oleh pemerintah.

Jenayah seks, hubungan rambang, penagihan dadah dan pelacuran menyebabkan AIDS merebak begitu cepat. Kita lihat kes AIDS yang berjumlah 399 pada tahun 1990 lalu begitu he-

bat berlaku terutama sekali dalam tiga bulan pertama Tahun Melawat Malaysia. Hingga 24 Mei 1990 sebanyak 14 kes dikesan dan 10 daripadanya meninggal dunia. Sehingga 28 Februari 1990 jumlah kematian adalah lapan daripada 12, pembawa AIDS 250 orang dan jumlah yang membawa kes penyakit AIDS seramai 262 orang. Sehingga 31 Disember, 1990 dalam tempoh sebulan kes AIDS 13. Pembawa 366, jumlahnya menjadi 399. Ini berlaku dalam tempoh satu bulan dan kes pembawa AIDS menjadi 104.

Perangkaan ini begitu hebat meningkat di bulan-bulan awal Tahun Melawat Malaysia - tiga bulan pertama Tahun Melawat Malaysia. Bayangkanlah, entah berapa ratus kes AIDS yang sedang berlaku di negara kita sekarang ini. Dalam keadaan manusia sebegini rupa, Kerajaan masih menggagalkan tempat maksiat terus berkembang. Dataran Merdeka yang tujuannya baik, Dayabumi, Kelab Selangor dan Bangunan Komtar yang tujuannya baik sekarang ini menjadi tempat maksiat. Seolah-olah Kerajaan memberi lesen kepada mereka. Pencegah maksiat tidak berani ke kawasan tersebut kerana kawasan-kawasan itu seolah-olah diisyiharkan zon bebas dan berkecuali.

Penjualan arak berlaku secara meluas di Pesta Pulau Pinang walaupun umat Islam di situ diketuai oleh seorang Ketua Perhubungan UMNO yang dahulunya bercita-cita untuk mewujudkan masyarakat insan kamil, "*insan maanawiah syaksiah*". Kita lihat sekarang ini di negerinya sendiri arak dijual secara berleluasa. Sehingga berlaku percaduhan di kalangan anak-anak muda kerana minum arak, barulah jualan arak dihentikan di Pesta Pulau Pinang. Bandingkan dengan

FIFA iaitu Persekutuan Pertubuhan Bolasepak Antarabangsa yang awal-awal lagi mengharamkan jualan dan minuman arak dalam Pestabola 1990 lalu. Walaupun mereka bukan orang Islam tetapi mereka mengetahui dan mengakui bahaya arak, lalu diharamkan di peringkat awal lagi.

Kebangkitan rakyat menuntut hak mereka, kalau dahulunya dituduh dihasut oleh komunis - demonstrasi Baling dikaitkan dengan hasutan komunis - mutakhir ini dikaitkan pula dengan perkauman, fanatik atau radikal agama. Rakyat Cheras yang menolak TOL kerana membebankan mereka, dikatakan mereka itu menentang Melayu kerana Datuk Bandar Kuala Lumpur seorang Melayu dan Syarikat Teratai (yang menyelenggara tol tersebut) dipunyai oleh Lembaga Urusan Tabung Haji.

Diberitahu dalam Dewan Rakyat, kononnya anak Melayu hampir dipukul dan dikerumuni oleh orang-orang Cina ketika berlaku tunjuk perasaan anti tol. Saya sendiri menghadiri perhimpunan anti tol tersebut. Memang saya dikerumuni bukan untuk dipukul tetapi diangkat ke atas bahu orang-orang Cina untuk saya memberi ucapan. Tidak ada pun yang hendak memukul orang-orang Melayu di situ. Kita lihat hal-hal perkauman dibawa sendiri oleh pegawai Kerajaan dan beberapa orang pemuda Melayu telah membuat laporan polis.

Jadi sekarang ini sebarang perjuangan yang dianggap membawa faedah kepada rakyat akan dikaitkan dengan perkauaman.

Fahaman nasionalis di tahun-tahun 40-60an begitu hebat sekali. Munculnya pemimpin nasionalis seperti Gamel Abdun

Nasser yang mewakili dunia Arab, Soekarno yang mewakili nasionalis Melayu dan Nehru yang mewakili nasionalis India. Di waktu itu golongan Islam berada di pinggiran, ditindas di setiap negara nasionalis sekular. Misalnya, Syed Qutb seorang pentafsir al-Quran yang menghasilkan kitab '*fi zilalil Quran*', syahid di tali gantung pada tahun 1967. Begitu juga seorang ulama yang terkenal di Iraq, Ayatollah Baqir Al Sadar ditembak mati sedangkan beliau ini seorang penulis buku ekonomi yang terkenal '*Iktisadunna*'. Beliau juga menulis buku '*Falsafatunna*' untuk menerajang jauh fahaman komunis dari pada dunia Islam.

Begitu juga di zaman keagungan nasionalis di Pakistan, Maududi berada dalam penjara. Zaman keagungan nasionalis di Indonesia, Pak Natsir, Dawood Beureueh dan banyak lagi ulama ditahan dalam rumah. Ada yang dipenjara dan ditaligantung. Kemuncak nasionalis di Malaysia ini dianggap berlaku di zaman pimpinan Dato' Seri Dr. Mahathir Mohamed. Maka di zaman inilah berlaku pembunuhan beramai-ramai di Memali; Ibrahim Libya dan murid-muridnya gugur syahid pada 19 November, 1985 yang lalu.

Akhir tahun 70an telah nampak bunga-bunga kehancuran komunis dan kehancuran nasionalis. Komunis yang digeruni dalam tahun 40an, 50an dan 60an telah nampak mula kehilangan taring dan gusinya. Brezhnev cuba membawa Soviet keluar daripada fahaman komunis tetapi dia takut kepada *politburo* tentera yang begitu kuat di waktu itu. Hanya di zaman Gorbachev, melalui *perestroika* dan *glasnost*, pembaharuan pembangunan dan politik dapat mengubah Eropah Timur daripada fahaman komunis dan sedang mencari ideo-

logi baru sekarang ini.

Empayar komunis Soviet mulai runtuh dan setiap negara kecil ingin mendapat kebebasan dari penjajahan Soviet. Agama diizinkan kembali untuk diamalkan. Kita hidup dalam masa dunia dalam keadaan disusun semula.

Kehancuran komunis membawa penyatuan kepada German. Inilah idaman rakyat German yang begitu lama iaitu bercantum kembali, kerana sikap dendam rakyat German terhadap Yahudi dan juga Amerika begitu tinggi sekali. German akan mencari rakan di Timur Tengah untuk mereka membuat satu kekuatan baru dalam era politik dunia disusun semula.

Mempertingkat Teknologi Pertanian Negara

(Dewan Rakyat, 15.1.1991)

DIDALAM mana-mana perang, sama ada mengikut undang-undang Pertubuhan Bangsa-bangsa Bersatu ataupun undang-undang Islam, ada perkara-perkara yang tidak boleh dianaiayai iaitu kanak-kanak, wanita, orang tua, dan tumbuh-tumbuhan. Mereka hendaklah dikecualikan dari sasaran perang.

Kelantan diperintah oleh Angkatan. Kelantan tidak berperang dengan Kerajaan Pusat tetapi Kerajaan Pusat sekarang cuba berperang dengan rakyat negeri Kelantan. Maka makhluk yang pertama disiksa di negeri Kelantan ialah padi. Padi tidak diberi makanan. Makanan padi ialah baja. Kalau perang pun pokok tidak boleh disiksa, inikan pula dalam masa damai. Pokok, batu-batan, haiwan semuanya sujud kepada Allah. Padi juga berdoa kepada Allah terutama bila mereka tidak dapat makan.

Kita boleh tanam padi, letakkan baja, tetapi yang menumbuhkannya ialah Allah. Misalnya negeri Melaka sekarang, negerinya boleh ditanam padi tetapi air tidak ada. Beri subsidi bajapun tidak guna juga, sebab tidak boleh tanam padi. Kedah misalnya, air cukup, baja cukup tetapi laporan akhbar dua hari lalu padi di Kedah ditimpa penyakit "AIDS" di mana buahnya gugur sebelum padinya masak.

Di Kelantan pula air cukup tetapi baja tidak ada. Padi akan menangis dan seluruh padi di negeri Kelantan akan berdoa, "Siapa punya angkara yang tidak beri aku makan". Maka kami akan membisikkan ke telinga padi, "Yang tidak memberi makan kepada kamu ialah Barisan Nasional".

Padi di negeri Kelantan sedang membesar. Sekarang masa mereka untuk diberi makan baja. Kita bimbang dalam keadaan begini padi yang disiksa ini akan membawa malapetaka ke lain-lain negeri sebab padi adalah makhluk Allah. Janganlah mereka disiksa. Siksa saya tidak apa.

Dalam ayat Al-Quran yang bermaksud:

"Maka ada hal kamu perhatikan, apakah kamu yang tanam, apakah kamu yang menumbuhkan, adakah Kami (iaitu Allah) yang menumbuhkan. Kalau Kami kehendaki pastilah kami jadikan ia kering dan hancur. Maka jadilah kamu hairan dan tercengang-cengang melihat kekuasaan Allah SWT."

(Maksud Al-Quran Surah Al Waaqiah ayat 63 - 65).

Perkara kedua yang ingin saya sentuh ialah Program Pertanian yang tujuannya mewujudkan masyarakat tani yang progresif supaya dapat menyertai secara aktif dalam arus pembangunan

negara khususnya dalam bidang pertanian, meningkatkan perindustrian bagi setiap unit pengeluaran melalui pemindahan teknologi dan perkhidmatan yang berkaitan dan meningkatkan sumbangan sektor pertanian dalam ekonomi negara dengan menggalak dan memajukan tanaman yang berekonomi.

Tujuannya ialah untuk membiak dan memproses, membekal biji benih baik kepada petani-petani. Tetapi kita lihat sekarang ini padi misalnya tidak dapat lagi mengeluarkan jenis tanaman yang baik. Walaupun ada MARDI yang menyelidiki dan mengeluarkan berbagai jenis benih tetapi masih lagi kita tidak dapat menandingi kualiti beras daripada Thailand dan juga Pakistan. Kemudian padi-padi yang ditanam di negara kita bijinya pendek, tidak seperti padi di Thailand dan Pakistan, bijinya panjang. Oleh itu penyelidikan hendaklah diteruskan.

Bila Yang Berhormat dari Tumpat bertanya bilakah jenis padi baru akan diperkenalkan, maka pihak Menteri menjawab setahun atau dua tahun lagi. Ini bermakna kita amat ketinggalan dalam menerokai benih-benih padi yang moden dan bermutu tinggi yang digemari oleh orang-orang sekarang untuk memakannya.

Begitu juga dalam penghasilan mempelam, setakat ini kita tengok telah baik terutama sekali mempelam yang dikeluarkan di negeri Perlis dan Kedah boleh dikatakan hampir setanding dengan mempelam yang dikeluarkan oleh Thailand. Tetapi dari segi mempelbagaikan penggunaan makanan mempelam dan sebagainya, kita masih jauh ketinggalan kalau dibandingkan dengan mempelbagaikan jenis penggunaan buah-buahan, makanan, kulit dan bijinya seperti yang di-

lakukan oleh penanam-penanam dan pekedai-pekedai di Thailand. Kita hendaklah juga meningkatkan dalam bidang itu supaya setiap hasil buah dapat diedarkan, dapat dimakan bijinya, kulitnya, semua dipelbagai gunakan.

Begitu juga saya ingin sebut lagi sekali orang-orang kampung sekarang amat suka menternak kambing biri-biri tetapi bulunya dibuang begitu sahaja. Tidak adakah teknologi untuk mencantikkan bulu, misalnya dengan sejenis *Avon* yang boleh disapu di badan kambing, dengan itu bulunya dapat diguna? Maka dapatlah ia menambahkan penghasilan kepada orang-orang kampung. Walaupun jenis baju yang kita keluaran tidak bermutu tinggi tetapi kita boleh hantar ke negeri-negeri seperti Afrika dan Afghanistan yang dilanda musim sejuk untuk Kerajaan kita membuat ehsan hasil daripada bulu kambing yang ada dalam negeri kita.

Berbalik tadi hal pertanian ini, sekarang ini kita mengimport beras begitu banyak dan kalau Kelantan berlaku kekurangan baja, maka penghasilan padi negeri Kelantan akan berkurangan. Ini akan membuatkan negeri kita menanggung beban untuk mengimport beras lebih banyak. Harga beras mungkin akan naik di lain-lain negeri, tetapi bagi rakyat Kelantan yang sempadannya begitu mudah untuk berulang alik ke Thailand, mereka mungkin boleh beli beras yang murah daripada Thailand. Tetapi bagaimana orang Kuala Lumpur, orang Melaka, orang Johor dan orang yang jauh dengan sempadan Thailand? Bagaimana mereka hendak memakan beras yang murah sedangkan beras menjadi mahal kerana tindakan Kerajaan Pusat sendiri memberhentikan baja kepada petani di negeri Kelantan?

Oleh itu Kementerian Pertanian, saya harap, mengambil betul-betul pandangan secara serius supaya tanaman padi ini diutamakan dan penghasilan makanan diutamakan. Kita lihat sahaja negeri Russia yang telah berjaya menghantar roket ke bintang-bintang, teknologi nuklearnya yang begitu agung dianggap nombor dua selepas Amerika, tetapi sekarang han-curnya Kerajaan Russia di antaranya, mereka tidak dapat menyediakan makanan. Mereka terpaksa melutut kepada negeri yang kecil seperti Belanda dan juga negeri-negeri yang kecil di sekitarnya untuk meminta bantuan makanan sedangkan Russia terkenal dengan teknologinya. Kita berbangga dengan Proton Saga, HICOM dan sebagainya. Kita bimbang satu hari kita terpaksa melutut ke negeri lain untuk meminta sedikit makanan untuk kita *survive* di Malaysia ini.

Lindungi Para Pengguna Dari Sebarang Penipuan

(Dewan Rakyat, 17.1.91)

HARGA minyak di pasaran New York semakin hari semakin naik dan dijangkakan ia akan terus naik sehingga \$100 dolar satu tong. Maka sudah tentulah Malaysia akan memperolehi pendapatan yang mengejut daripada penghasilan minyak ini. Tetapi barang-barang makanan sudah tentu akan naik melambung. Barang-barang makanan kita kebanyakannya diimport; ubi kentang, bawang, gula, gandum, beras, buah-buahan, sardin dan berbagai-bagai lagi. Kos pengangkutan akan meningkat, maka harga barang akan naik melambung.

Oleh itu saya mengharap dan mencadangkan supaya pendapatan secara mengejut hasil kenaikan harga minyak ini digunakan untuk subsidi barang-barang keperluan utama kegunaan rakyat sebab kita sudah jangka harga barang akan naik melambung. Dengan pendapatan yang tidak berubah, sudah tentu semua rakyat akan menderita dengan kenaikan harga barang ini walaupun pendapatan Kerajaan bertambah

kerana kenaikan mengejut harga minyak ini.

Kita harap pihak Kementerian Dalam Negeri dan Hal Ehwal Pengguna akan mengambil langkah memperuntukkan untuk melindungi harga barang makanan utama, terutama makanan harian kepada rakyat luar bandar dan rakyat miskin. Sebelum Perang Teluk meletus pun kita memang telahpun menghadapi kenaikan harga barang, tetapi sudah tentulah mulai daripada sekarang kenaikan harga barang itu akan semakin ketara.

Kesan daripada embargo minyak pada tahun 1973 ekoran perang antara Arab dengan Israel dahulu telah berlaku kenaikan harga barang begitu hebat. Menteri Perdagangan di waktu itu, Tun Hussein Onn menjalankan satu program menukuhan satu pasukan yang dipanggil Pasukan Anti Sorok untuk bertindak terhadap tauke-tauke atau pemborong-pemborong yang menyorok barang-barang untuk dijual ketika harganya naik, yang dianggap boleh mendapat keuntungan yang maksimum.

Kita harap Kementerian sekarang ini juga mengambil daya usaha itu. Tubuhkan segera pasukan anti sorok untuk menggempur gudang-gudang yang besar. Perasaan kapitalis mereka ini sudah tentu tidak ada kasihan belas. Mereka akan menyimpan barang-barang untuk menikmati keuntungan mengejut. Mereka sanggup simpan sehingga 2-3 bulan lagi sehingga harga barang itu dianggap berada di kemuncak. Oleh itu, kita cadangkan pasukan anti sorok ini ditubuhkan segera supaya kawalan terhadap harga barang dan membanteras penyorokan barang-barang ini dapat diadakan dengan segera.

Kemudian dalam keadaan kenaikan harga barang yang sudah pasti berlaku, Kementerian ini dengan kerjasama RTM perlu mengadakan kempen daripada sekarang menjimatkan barang-barang yang dianggap kita susah mendapatnya dan barang-barang keperluan asas. Berkempenlah melalui poster-poster supaya kita tidak membazir untuk menghadapi suasana yang tidak menentu di masa-masa akan datang.

Kempen-kempen melalui poster-poster dan iklan-iklan yang menarik orang ramai untuk berjimat cermat, terutama sekali bahan-bahan makanan yang dijangka naik seperti gandum, ubi kentang dan lain-lain bahan yang datang daripada luar negeri hendaklah dibuat daripada sekarang. Persatuan Pengguna dengan kerjasama Kementerian ini berkempen juga untuk menggalakkan makan makanan tempatan, sayuran tempatan dan menggalakkan balik pengguna-pengguna untuk menanam sendiri bahan-bahan makanan. Dengan itu, dapat kita hadapi suasana tidak menentu di masa-masa yang akan datang.

Pihak Kementerian ini juga hendaklah menggalakkan orang ramai menyertai Persatuan Pengguna seperti CAP ataupun FOMCA dan sebagainya. Mereka hendaklah digalakkan untuk muncul sekarang, untuk menghebahkan kepada rakyat perkara-perkara yang perlu mereka lakukan. Dan pihak Kementerian hendaklah memberi sokongan sepenuhnya kepada Persatuan Pengguna supaya rakyat peka, dengan itu rakyat sendiri dapat mengawal harga barang. Keadaan sebegini terbukti berlaku kepada Persatuan-persatuan Pengguna di Eropah yang berjaya mempertahankan harga barang ataupun memboikot satu-satu syarikat yang didapati menjual barang dengan harga yang

tidak berpatutan.

Kita harap Kementerian ini akan berganding bahu dengan Persatuan Pengguna dan tidak menjadikan Persatuan Pengguna sebagai musuh kepada Kementerian. Dan Persatuan Pengguna pula diberi peluang untuk muncul di TV, Radio dan sebagainya untuk menggalakkan mereka mengemukakan idea bagi melindungi para pengguna.

Kemudian konsep ataupun budaya kepenggunaan, '*consumerisme*' yang lebih bersifat *luxury* dan bukan keperluan asas yang boleh menjahamkan kehidupan masyarakat, hendaklah dikurang dan dihentikan. Misalnya pengiklanan rokok yang menunjukkan bahawa penghisap rokok itu memiliki kereta *Porsche* yang cantik ataupun wanita cantik ataupun kehidupan yang bertaraf tinggi. Maka pihak Kementerian hendaklah melindungi pengguna supaya mereka tidak terperangkap dalam konsep *consumerisme* yang bersifat *luxury* yang sekarang ini sedang menjadi-jadi di negara kita.

Begitu juga sekarang ini kempen-kempen penggunaan Master Card, Visa Card, American Express dan Diner's Club patut dikurangkan. Sebab dengan kita menggalakkan penggunaan kad-kad seperti ini, pengguna akhirnya tertipu dengan iklan-iklan yang begitu hebat. Sehingga sekarang ada orang pergi ke kedai roti canai pun cuba menunjukkan Visa Cardnya, menunjukkan ia orang hebat. Inilah pengaruh yang menyebabkan pengguna kadang-kadang tertipu. Peniaga-peniaga kecil juga kadang-kadang terpaksa juga memiliki kad ini untuk menunjukkan mereka itu orang yang ada *standard*.

Begitu juga iklan-iklan membeli rumah. Rumah tidak lagi dijadikan keperluan asas, tetapi ia menjadi bahan *luxury*. Dalam iklan-iklan sesuatu taman misalnya ditunjukkan keindahan-keindahan supaya orang berebut membeli rumah di kawasan tersebut. Tetapi bila diduduki rumahnya, baru dilihat bocor di sana, bocor di sini. Ini juga perlu pihak Kementerian melindungi pengguna sebab pengiklanan jualan rumah sekarang ini berunsur mengada-ada sehingga rumah bukan lagi menjadi tempat perlindungan, tetapi telahpun menjadi bahan *luxury*.

Maka berlakulah kenaikan harga rumah. Keindahan *luxury* jadi tumpuan, sedangkan tempat perlindungan semakin susah dan sukar didapati. Konsep-konsep *consumerisme* hendaklah diperbetulkan semula. Kesedaran menggunakan sekadar keperluan diutamakan dan bukan untuk memenuhi selera kepenggunaan yang akhirnya ia memperkayakan kapitalis tertentu, terutama di kalangan anggota parti politik pemerintah.

Konsep *cheap sale* selalunya menipu pengguna. Oleh itu, Kementerian ini hendaklah mempergiatkan lagi usaha membanteras konsep *cheap sale* yang sebenarnya "mahal sale." Inilah penjualan yang mahal yang dikira kalau dijual harga berapa pun, syarikat itu tetap mendapat keuntungan. Oleh itu, di saat kita menghadapi keadaan begini, Kementerian ini hendaklah memperkuatkan lagi semua anggota Kementeriannya untuk bertindak, terutama sekali bagi mengadakan pasukan petugas mengawal harga barang untuk melindungi pengguna.

Ke Arah Menjamin Keselamatan Negara

(Dewan Rakyat, 18.1.1991)

SAYA merujuk Butiran Pentadbiran Pertahanan yang jumlah peruntukannya \$156,849,100. Dan rujukan Bahagian (a) Aktiviti Pentadbiran Pertahanan iaitu Pentadbiran Perkhidmatan, Perjawatan, Latihan, Perancangan dan Pembangunan, dan Pentadbiran Agama dan Kebajikan dan (b) Aktiviti Perkhidmatan Tentera iaitu tujuan memberi khidmat ketenteraan yang diperlukan untuk menjamin keselamatan dan untuk menentang musuh negara.

Sekarang ini Amerika ada pangkalan tenteranya di Singapura dan kita juga difahamkan di sana juga ada penasihat-penasihat tentera daripada Israel. Dengan peristiwa yang berlaku di Timur Tengah, kita amat bimbang kehadiran Amerika dan Israel berhampiran dengan negeri kita. Sebab negeri yang akan mengancam sesuatu negeri ialah negeri yang berhampiran. Lebih-lebih lagi apabila perjanjian dibuat baru-baru ini antara Perdana Menteri Singapura ketika itu, Lee Kuan Yew

dengan Naib Presiden Amerika, Dan Quayle untuk memberi kemudahan kepada tentera Amerika menjadikan Singapura sebagai pangkalan, ianya akan menjadikan Asia Tenggara ini pada masa hadapan terancam dengan kehadiran kuasa besar.

Rakyat Malaysia perlu bimbang dengan kehadiran tentera Amerika dan Israel di Singapura. Ia boleh mencetuskan konflik seperti yang berlaku di Timur Tengah. Sejauh manakah pertahanan dan persiapan negara kita untuk menghadapi sebarang kemungkinan jika berlaku suatu perkara yang kita tidak ingini? Kita tidak mahu satu hari nanti negeri kita ditelan oleh kuasa besar, kerana kita melihat potensi ke arah itu memang ada.

Perkara kedua yang saya ingin sentuh ialah pembinaan jambatan yang kedua menghubungkan Johor dan Singapura. Ada pihak-pihak keselamatan yang tidak begitu setuju pembinaan jambatan itu kerana jambatan itu menuju ke kawasan Jurong, satu kawasan industri. Saya difahamkan juga di penghujung jambatan di sebelah Singapura sana terdapat sebuah kilang membuat senjata kimia.

Jadi, dari sudut keselamatan, pembinaan jambatan itu tidak berapa disetujui oleh sesetengah pihak keselamatan negara kita kerana bila berlaku sesuatu perkara maka jambatan itu begitu mudah untuk menjadi satu saluran masuk pihak musuh ke negara kita.

Perkara yang seterusnya ingin saya sentuh ialah Kor Agama hendaklah ditingkatkan kerana peperangan mutakhir ini. Peperangan teknologi moden belum tentu dapat memberi

kekuatan kepada tentera-tentera kita. Oleh itu Kor Agama hendaklah dipertingkatkan. Jiwa tentera hendaklah diisi dengan kekuatan agama yang kental. Untuk itu program seperti *qiyamullail* hendaklah dipertingkatkan. Dan janganlah kita takut, seperti bekas Menteri Belia dahulu takut bila disebut perkataan '*qiyamullail*'. Padahal *qiyamullail* atau ibadat malam ini untuk menguatkan jiwa seseorang menghadapi segala cabaran.

Seterusnya saya ingin sentuh Butiran Perkhidmatan Logistik yang peruntukannya \$665,882,700, rujukan Aktiviti Perkhidmatan Logistik. Penerangan aktivitinya iaitu aktiviti ini adalah bertanggungjawab di dalam penyediaan dan pembahagian segala keperluan untuk Angkatan Tentera meliputi makanan, pakaian tentera, senjata, peluru, pengangkutan, pembinaan dan juga perumahan. Di dalam Laporan Juruaudit yang dikeluarkan di Parlimen dan ianya mengenai Akaun Kerajaan Persekutuan tahun 1988, ada perkara-perkara yang ditimbulkan oleh pihak Ketua Audit Negara. Dan kita harap pihak Kementerian Pertahanan dapat memberi penjelasan apakah perkara-perkara ini telahpun selesai ataupun telah diambil tindakan.

Misalnya mengenai alat ganti yang tidak bergerak. Setor TUDM masih menyimpan 17,499 jenis alat ganti bernilai \$12.46 juta bagi berbagai jenis pesawat dan kenderaan, walaupun alat ganti itu tidak pernah diminta bagi tujuan penyelenggaraan atau pembaikan beberapa lama. Setengah daripada alat ganti itu tinggal begitu sahaja sejak 20 tahun yang lampau.

Seterusnya mengenai permintaan alat ganti bagi '*aircraft on ground*' (pesawat atas tanah). Bagi *aircraft on ground*, sebarang alatganti yang diperlukan hendaklah dibekalkan oleh Depoh dalam tempoh 24 jam. Sekiranya alatganti berkenaan tidak dapat dibekalkan, maka pembaikan kapalterbang berkenaan akan terjejas dan tidak boleh dibuat dalam masa yang dikehendaki. Pada waktu lawatan Audit ada terdapat beberapa buah pesawat TUDM yang belum lagi dibaiki kerana alatganti tidak dapat dibekalkan oleh Depoh.

Kemudian, berkenaan bayaran tambahan kerana gagal membekal alatganti. Dalam buku Laporan Audit ada tersebut, mengikut perjanjian di antara Kementerian Pertahanan dan Airod Sendirian Berhad, semua alatganti yang diminta oleh Airod hendaklah dibekalkan oleh Depoh TUDM. Sekiranya Depoh tidak dapat membekalkan alatganti tersebut, maka Airod boleh membuat pembelian daripada pembekal lain dengan mengenakan TUDM bayaran perkhidmatan sebanyak 20 peratus ke atas harga belian.

Bagi tempoh 1987 hingga tahun 1988, Depoh TUDM tidak dapat memenuhi 12,778 permohonan berbagai jenis alatganti yang dipesan oleh Airod. Akibatnya Kementerian terpaksa membayar sebanyak \$5.34 juta kepada Airod kerana gagal membekalkan alatganti yang telah dipesan dalam tempoh yang ditetapkan. Entinya Kementerian Pertahanan rugi ataupun kena bayar \$5 juta lebih kepada Syarikat Airod.

Seterusnya, komponen pesawat tidak dapat dibaiki oleh kontraktor. Pada tahun 1985, Kerajaan telah mengikat satu kontrak bernilai \$110 juta dengan Airod yang dikehendaki

membaiki alat-alat komponen pesawat TUDM yang mengalami kerosakan. Sebanyak 735 alat komponen yang dihantar kepada Airod masih belum dibaiki dan ada di antaranya sudah lebih daripada 2 tahun berada di woksyop Airod.

Kementerian belum lagi mengambil sebarang tindakan bagi mengenakan denda atas Airod berhubung dengan kelemahan ini seperti yang diperuntukkan oleh syarat-syarat kontrak.

Kita harap pihak Kementerian Pertahanan mengambil satu perkara yang serius mengenai masalah kerugian ataupun belanja lebih yang terpaksa dikeluarkan di atas kelalaian pihak Kementerian Pertahanan sendiri.

Pelajar Universiti Terkongkong dan Terhimpit

(Dewan Rakyat, 21.1.1991)

SAYA ingin menyentuh Butiran Pentadbiran Umum dan Pentadbiran Pendidikan Negeri-negeri.

Pertama sekali hal guru-guru. Kita tahu bahawa dua orang guru yang ditahan di bawah ISA di Kamunting telah dibuang kerja di atas alasan mereka tidak hadir untuk mengajar di sekolah. Macam mana mereka hendak hadir sebab mereka berada dalam Kem Tahanan Kamunting!

Di zaman Dr. Mahathir, Dato' Musa Hitam dan Dato' Abdul-lah Ahmad Badawi menjadi Menteri Pelajaran, ramai guru yang ditahan di bawah ISA seperti pada tahun 1980, 1974 dan sebagainya. Tetapi mereka tidak dibuang daripada mengajar. Hanya sekarang di bawah Menteri Pendidikan yang menjadi juara penentang ISA suatu ketika dulu, maka guru-guru yang ditahan di bawah ISA dibuang dengan alasan mereka tidak dapat pergi mengajar ke sekolah.

Di bawah Butiran Aktiviti Pengurusan Pendidikan Islam. Sekarang ini di universiti-universiti perlantikan Dekan dan Profesor-profesor Madya difahamkan lebih bermirip kepada kecenderungan seseorang itu dalam politik ataupun kecenderungan kepada orang-orang tertentu.

Perlantikan-perlantikan yang berdasarkan kepada politik ini menyebabkan kita lihat pencapaian akademik di universiti mulai lemah. Misalnya, di Fakulti Islam Universiti Kebangsaan Malaysia, perlantikan tenaga akademiknya, Profesor Madyanya dan juga yang menjadi Ketua Pentadbir di situ menyebabkan ianya bukan orang yang dianggap berkelayakan. Sudah tiga tahun kakitangan akademik di Fakulti itu tidak ada mesyuarat. Bagaimanakah mereka hendak bincang untuk menaikkan prestasi akademik sedangkan sudah tiga tahun Fakulti Islam, Universiti Kebangsaan Malaysia, kita difahamkan tidak ada mesyuarat. Ini memperlihatkan bagaimana perlantikan yang berbau politik ini lambat-laun akan merugikan dan merendahkan nilai akademik di universiti-universiti.

Dalam Butiran Pemberian Peruntukan Universiti Sains Malaysia dan Universiti Islam Antarabangsa. Universiti Islam Antarabangsa ialah satu universiti yang bertaraf antarabangsa. Pelajar-pelajarnya sekarang ini dikongkong begitu dahsyat sehingga mereka ini kalau hendak bertemu dengan parti Pembangkang seperti kami terpaksa diadakan di luar kampus di sebuah rumah yang sunyi dan dikawal pula di depannya. Ertinya pelajar-pelajar itu ada pengawal sendiri tengok kalau-kalau mereka diintip ataupun diketahui mengadakan pertemuan dengan parti Pembangkang.

Orang-orang politik tertentu disenarai-hitamkan; tidak boleh masuk berceramah atau berforum di Universiti Islam Antarabangsa. Sedangkan Universiti Islam Antarabangsa sepatutnya menjadi betul-betul bertaraf antarabangsa, diberi kebebasan kepada para pelajarnya menganjurkan forum, ceramah atau pertemuan dengan parti-parti politik. Sebaliknya, para pemimpin politik termasuk pemimpin-pemimpin UMNO tertentu disenarai-hitamkan juga, tidak boleh masuk ke UIA.

Keadaan ini sudah tentulah menyebabkan pencapaian pengetahuan mereka terutama hal-hal isu semasa akan menjadi terbantut. Sebab itu kita berharap Kementerian Pendidikan mengambil perhatian serius terhadap kebekuan pelajar UIA sekarang ini. Bagaimana hendak melahirkan seorang peguam Islam, ahli ekonomi Islam yang baik sedangkan mereka dikongkong sedemikian rupa sehingga pelajar-pelajar itu menjadi takut.

Dalam satu pertemuan dengan pelajar-pelajar UIA, saya lihat mereka itu berada dalam keadaan serba salah. Mereka kata: "Jaga, kalau kami kelihatan, maka kami akan dipanggil oleh Ketua kami, dan kami akan diambil tindakan." Saya kata: "Saya dari parti politik yang halal." Jawab mereka: "Bukan daripada PAS saja, daripada UMNO tertentu pun kami tidak boleh jumpa."

Inilah perasaan pelajar-pelajar UIA sekarang hasil kongkongan yang dikenakan terhadap mereka. Saya rasa keadaan sedemikian tidak sesuai langsung dengan universiti yang sepatutnya bertaraf antarabangsa.

Seterusnya hal Universiti Sains di Pulau Pinang. Saya ingin sentuh rungutan pelajar-pelajar di peringkat *post-graduate* (Sarjana dan Kedoktoran). Perhatian hendaklah diberi bawah pelajar-pelajar *post-graduate* ini biasiswa yang diprurunkkan kepada mereka terlalu rendah. Pihak Kementerian telah berjanji lima tahun yang lalu untuk mengkaji kenaikan biasiswa kepada mereka kerana \$450 untuk sewa dan makan, khususnya kepada *post-graduate* yang kebanyakannya telah berkeluarga, menyebabkan mereka hidup dalam keadaan sempit. Bagaimanakah mereka hendak buat *Ph.D* atau *Master Degree* sedangkan kehidupan mereka amat terhimpit di Bandaraya Pulau Pinang.

Antara Teluk Parsi Dan Teluk Siam

(Dewan Rakyat, 22.1.1991)

LAUT China Selatan didapati mempunyai minyak yang banyak. Perjanjian Sempadan Malaysia - Thai telah ditandatangani untuk menerokai carigali minyak bersama di luar pantai Kelantan bagi menambahkan pendapatan kepada Malaysia.

Sekarang Kerajaan Kelantan diperintah oleh Angkatan. Kita bimbang usaha mencarigali minyak ini dihentikan atau diperlahankan sebab kalau dicarigali minyak maka sekurang-kurangnya 5% hasilnya akan pergi kepada Kerajaan Negeri.

Kita difahamkan pula sekarang ini di pihak Thailand, carigali minyak diteruskan. Sedangkan, saya difahamkan bahawa permukaan dasar laut lebih tinggi di Kelantan dan lebih rendah di pihak Thailand. Maka Thailand akan memperolehi minyak daripada Malaysia disebabkan bumi kita tinggi dari-pada Teluk Siam, kawasan yang dicadangkan untuk mengepam

keluar minyak daripada daerah tersebut.

Iraq menuduh Kuwait mencuri minyaknya kerana telaga minyak di Ramalah itu walaupun berada di dalam negeri Kuwait, tetapi pihak kajibumi Iraq mendapati minyak yang dipam itu datang dari Iraq. Akhirnya hal Telaga Minyak Ramalah itu membawa kepada Perang Teluk.

Kita bimbang jikalau Kerajaan Malaysia perlahan dalam usaha mencarigali minyak ini, maka peristiwa yang sama akan berlaku. Iaitu minyak Malaysia akan dipam oleh Kerajaan Thailand dan kita tidak mahu selepas perang Teluk Parsi, akan jadi pula perang Teluk Siam kerana minyak kita sedang dipam nanti.

Kita berharap supaya pihak Kerajaan, khususnya Kementerian Kewangan, berusaha dengan cepat agar telaga-telaga minyak dapat dibina dengan segera. Dengan itu, kalau pun Thailand mengepam minyaknya, kita juga menghisap minyak daripada bumi kita. Jika tidak, bumi kita akan kekeringan minyak dan Thailand akan memperolehi minyak kita disebabkan bentuk muka bumi permukaan laut.

Pertingkat Mutu Kawalan Keselamatan Negara

(Dewan Rakyat, 23.1.1991)

PERTAMANYA saya ingin membuat pujian yang khas kepada ASP Fauzi Shaari, Ketua Polis Dang Wangi yang begitu hebat mencegah jenayah di Kuala Lumpur sekarang ini. Satu perkara yang didedah oleh beliau, iaitu apabila tempat-tempat lacur di hotel-hotel di rempuh oleh beliau maka sindiket pelacur ini didapati telah mengesan perbualan polis. Ertinya alat telefon yang dimiliki oleh sindiket pelacur ini lebih baik daripada yang dimiliki oleh Polis Di Raja Malaysia. Perbualan polis boleh dirakam oleh sindiket ini. Sebaliknya perbualan sindiket ini tidak boleh dirakam oleh polis. Bagaimana alat yang begitu *sophisticated* boleh dibawa masuk dan dapat melintasi pegawai-pegawai imigresen yang bertugas di sempadan negara kita?

Walaupun perkara ini didedahkan oleh Ketua Polis yang begitu hebat mencegah jenayah tetapi beliau mengatakan bahawa sindiket pelacur menggunakan kereta bergerak ini

begitu hebat dan setakat ini belum boleh dikesan dengan sepenuhnya. Kita harap pihak Menteri Dalam Negeri dan Kementeriannya menumpukan usaha ini: Pertama, masalah pelacuran yang begitu hebat di peringkat yang *sophisticated*; dan kedua, bagaimana alat seperti itu dapat masuk.

Kalau alat ini sekarang digunakan dalam sindiket pelacuran bagaimana pada masa hadapan ia digunakan dalam sindiket-sindiket lain seperti untuk menumbangkan Kerajaan secara haram ataupun terlibat dalam jenayah yang lebih merbahaya kepada negara? Kita sayang kepada negara!

Kemudian, kita melihat juga sekarang ini berlaku seksaan terhadap orang-orang gaji terutama sekali pendatang-pendatang dari Indonesia. Ada antara wanita-wanita pendatang yang bekerja sebagai orang gaji, mereka ini diseksual oleh majikan dan ada di antara mereka yang bekerja di rumah-rumah orang bukan Islam terpaksa memasak bahan-bahan makanan yang haram dipegang dan dimakan oleh orang-orang Islam.

Ada antara mereka ini melarikan diri tetapi mereka tidak ada tempat untuk mengadu dan akhirnya ada di antara mereka yang terjebak ke lembah pelacuran. Kita harap pihak Kementerian Dalam Negeri dapat menjaga sindiket ini dan memelihara supaya orang-orang gaji yang datang daripada luar negeri tidak dieksplotikan oleh tauke-tauke yang mengambil keuntungan, kemudian menghantar mereka ke lembah pelacuran.

Kemudian, Butiran Rawatan dan Pemulihan Dadah yang

berjumlah \$16,904,400. Penagihan dadah adalah satu perkara yang amat serius di Malaysia sekarang. Walaupun usaha-usaha pemulihannya dijalankan begitu giat, kami masih melihat ia tidak begitu serius dijalankan. Misalnya baru-baru ini satu kumpulan rock yang ditangkap dua tiga kali kerana disyakki menagih atau mengedar dadah telah diberi peluang memberi ceramah di Pusat-pusat Serenti dan ceramah itu disiarkan pula dalam televisyen.

Mereka yang disyakki ataupun ditangkap dua tiga kali kerana dadah dan akhlaknya yang dianggap tidak baik di sudut Islam, orang ini dipanggil untuk memberi ceramah kepada penagih-penagih dadah di Pusat Serenti. Sedangkan kita, PAS, memberi tawaran beberapa kali. Kami daripada PAS bersedia untuk menjadi tenaga penceramah kepada penagih-penagih dadah. Tetapi pihak Kementerian Dalam Negeri hingga sekarang ini tidak menyambut seruan itu.

Saya sendiri bersedia untuk berkhidmat memberi ceramah kepada penagih-penagih dadah. Janganlah dibimbangkan kalau selepas itu penagih dadah itu menjadi pengikut PAS! Itu jangan dijadikan persoalan pokok. Tetapi kenapa meminta bantuan orang-orang yang ditangkap dua tiga kali menagih dadah dan diberi publisiti pula secara besar-besaran dalam televisye? Ini menyebabkan orang melihat orang yang ditangkap dua tiga kali kerana disyakki penagih dadah ini disanjung oleh pihak pemerintah.

Baru-baru ini 30 orang artis pula disyakki penagih dadah dan ditangkap oleh pihak Kementerian Dalam Negeri. Setelah diuji air kencing mereka, saya difahamkan dua orang didapati

positif dan sah mereka adalah penagih dadah. Dua orang itu adalah penyanyi dan pelakon yang terkenal. Nama mereka ada pada saya.

Tetapi kita lihat selepas itu orang-orang seperti itu disanjung terus oleh pihak Kerajaan dan pihak Kementerian Dalam Negeri tidak berbuat apa-apa. Ini akan menyebabkan tertanam dalam pemikiran rakyat, "penagih dadah pun tidak apa asalkan ia terkenal, ia akan disanjung oleh pemerintah". Wabak penyakit dadah, penagih dadah dan juga pengedaran dadah akan terus berleluasa kalau Kerajaan tidak mengambil serius dari segi moral dan juga undang-undang.

Mengenai Pencegah Jenayah Butiran Audit ke atas pungutan hasil Kerajaan Persekutuan. Ibu Pejabat Polis Daerah Jasin mendedahkan beberapa kelewatan dan ketinggalan dalam memasukkan pungutan hasil Persekutuan di dalam bank. Di antara bulan Disember 1987 hingga April 1989 kutipan sebanyak \$214,548 telah diakui diterima tetapi jumlah yang dibankkan hanya \$133,697. Baki sebanyak \$80,851 tidak dibankkan kerana telah disalahgunakan oleh Kerani dan Pegawai Kewangan. Bagaimana siasatan kes ini dan kita mendapat khabar ia masih tidak di ambil tindakan apa-apa.

Begitu juga Ketua Cawangan Trafik Jalan Bandar, Kuala Lumpur. Semasa diaudit kira-kira hasil di Pejabat Ketua Cawangan Trafik Kuala Lumpur pada bulan Jun 1989, kutipan hasil sebanyak \$108,214 bagi tempoh Jun 1988 hingga Jun 1989 tidak dapat disahkan kerana wang tunai dalam tangan atau bukti lain seperti penyata pemungut tidak dapat dikemukakan. Bagaimanapun, apabila semakan ke atas *flimsi*

di Perbendaharaan dibuat, didapati \$72,421 sahaja dibankkan dan baki sebanyak \$35,793.00 dilesapkan. Sampai sekarang tindakan, kita dengar khabar, belum dijalankan.

Kemudian saya masuk Butiran Logistik. Sekarang ini Langkawi menjadi pusat pelancongan. Dari sebelah hujung utara Pulau Langkawi kita dapat nampak negeri Thailand. Penduduk -penduduk tempatan memberitahu bahawa pelacur-pelacur dibawa dari Thailand ke pulau itu secara terbuka dengan hanya menggunakan bot-bot nelayan kerana rondaan-rondaan Polis tidak ada di situ.

Dengan terdedahnya sempadan sedemikian rupa, ia boleh jugadimasuki unsur-unsur lain, seperti penjenayah-penjenayah dan berbagai-bagai unsur negatif yang boleh mengganggu keselamatan Malaysia. Kita harap pihak Kemnterian Dalam Negeri membuat rondaan yang lebih hebat di Pulau Langkawi terutama di sebelah yang bersempadan dengan daerah-daerah Thailand.

Imperialisme Media, Penjajahan Bentuk Baru

(Dewan Rakyat, 24 dan 25.1.91)

SAYA ingin menyentuh Aktiviti Pengesan Siaran yang bertujuan untuk bertindak sebagai jentera maklumbalas dan menganalisa perkembangan dunia antarabangsa melalui siaran-siaran media elektronik, radio dan siaran-siaran melalui *tele-printer* sama ada yang rasmi atau yang haram dari dalam dan juga luar negeri.

Kita lihat selepas Perang Dunia Kedua, Barat telah melakukan penjajahan dalam bentuk kolonial terhadap Kerajaan-kerajan yang kecil. Tetapi mereka melancarkan pula apa yang dipanggil 'imperialisme media'. Barat sekarang tidak suka lagi menjajah tanah tetapi mereka suka menjajah dalam bentuk baru - penjajahan media. Program-program yang berbentuk memuja Barat memang diutamakan di dalam siri-siri televisyen.

Kajian telah dibuat oleh pihak jawatankuasa bebas di Amerika

Syarikat mendapati bahawa golongan *middle class* di negara itu menonton televisyen 30 jam satu minggu. Di dunia ketiga ini, walaupun kajian tidak dibuat secara menyeluruh tetapi pelajar-pelajar yang telah membuat kajian itu mendapati bahawa tidak kurang juga masyarakat dunia ketiga ini menonton televisyen. Kadangkala melebihi 30 jam seminggu. Oleh itu sudah tentulah untuk menjajah pemikiran, bahan ini perlu diambilkira. Media ini perlu diterokai untuk menjajah pemikiran rakyat di dunia ini.

Sebab itulah kita lihat dalam imperialisme media ini Amerika memang berjaya membentuk rakyatnya sehingga rakyatnya meletakkan fahaman ataupun anggapan "*The Great America*" ataupun "*God Bless America*", menyebabkan semua yang dilakukan oleh Amerika dinampakkan hebat. Kemudian imperialisme media ini juga datang ke negara-negara dunia ketiga. Ia turut diambil oleh RTM, kadang-kadang tanpa ditapis dan terus memuja Amerika itu.

Inilah imperialisme yang sedang melanda TV-TV di dunia ketiga, tidak terkecuali di Malaysia ini. Misalnya, kita boleh melihat corak media mengagungkan seseorang. Kalau mereka mengagungkan Fidel Castro, maka dunia akan menerima Castro sebagai hero. Bila mereka mengagungkan Mao Tze Tung, maka dunia akan mengagungkan Mao Tze Tung. Bila mereka cuba mengagungkan Saddam Hussein, dunia mengagungkan Saddam Hussein. Bila mereka cuba memburukkan Saddam Hussein, dunia memburukkan Saddam Hussein. Inilah imperialisme bentuk baru.

Begitu juga dalam hal Islam, filem mereka menggambarkan

keburukan dan kelemahan Islam. Misalnya digambarkan kalau pemerintah Timur Tengah mesti beristeri ramai. Beristeri lebih daripada satu dianggap kotor dan jijik sedangkan ia dihalalkan oleh Islam. Tetapi inilah gambaran yang digambarkan dalam media yang menyebabkan poligami itu menjadi satu fahaman yang jijik, disebabkan perangai buruk yang digambarkan melalui perlakuan pemerintah Timur Tengah itu. Media menggambarkan bila ditunjuk Raja Arab, maka tidak lain mereka adalah ‘kaki betina’. Sedangkan Arab itu sering dikaitkan dengan Islam.

Imperialisme media ini memang di tahun-tahun 60an, 70an dan awal 80an menonjolkan kehidupan tanpa nikah dan juga cuba menolak fahaman nikah itu dengan menganggapnya satu fahaman yang kuno. Fahaman penjajahan media baru ataupun imperialisme media ini bertentangan dengan fahaman agama sama ada Hindu, Budha, Kristian ataupun Islam dan imperialisme media ini juga menonjolkan kehidupan *homosexual*, *bi-sexual*, *lesbian*, *multi-partners* dan bermacam-macam lagi sebagai budaya baru. Tetapi oleh kerana Allah sayangkan manusia, Allah menyelamatkan manusia dengan menurunkan bala AIDS.

Bala AIDS ini menyebabkan masyarakat di Barat sendiri memikir kembali tentang kehidupan berkeluarga itu. Misalnya, di Barat sendiri sekarang ini beberapa negeri menolak *video-tape* Madonna yang terbaru yang menggambarkan bagaimana adegan-adegan *bi-sexual*, *lesbian*, *multi-partners* dan sebagainya. Tetapi kita lihat di kaca TV seperti yang diakui dan disiarkan dalam akhbar, pandangan yang diberikan oleh Timbalan Menteri Dalam Negeri, kadang-kadang filem-

filem itu ada yang tidak ditapis. Adegan-adegan seks dan adegan-adegan ganas yang melampau terlepas daripada guntingan, kerana ada pegawai-pegawai di situ yang barangkali tidak bersikap jujur untuk mengeluarkan filem-filem yang menggambarkan tidak menghormati pandangan agama.

Begitu juga imperialisme media ini menonjolkan iklan-iklan. Kajian perlu dibuat bagaimana iklan-iklan seperti iklan Coca-Cola dan minuman-minuman yang datang daripada Barat berkekalan dalam otak pemikiran orang ramai menyebabkan bila Kementerian Pertanian memperkenalkan minuman air asam jawa, minuman air jambu dan minuman-minuman tempatan, ia tidak diambil hirau oleh orang ramai terutama sekali mereka yang menonton televisyen 30 jam seminggu. Gejala baru yang menyebabkan media menjadi satu imperialisme baru kepada manusia ini amat serius kalau kita tidak mengambil tindakan awal. Begitu juga filem-filem yang menggambarkan bahawa lahirnya anak-anak haram, anak-anak luar nikah ditayangkan di TV kita, terutama sekali di tahun 60an, 70an dan di awal tahun 80an.

Kita harap tahun 90an ini adegan-adegan ataupun cerita-cerita yang menggambarkan bahawa anak luar nikah itu baik, pasangan ibubapa penzina itu baik, filem-filem seperti itu tidak dita-yangkan lagi kerana ini akan menyebabkan gejala buruk yang akhirnya melahirkan penyakit AIDS dan bencana kepada manusia.

Akhirnya, saya ingin menyentuh hal rancangan agama di televisyen. Kita lihat sekarang ini penonton paling kurang sudah tentulah rancangan agama. Jikalau rancangan hiburan

dicari artis *top* untuk diambil berhibur. Artis-artis seperti Aishah, Ella & The Boys dan Headwind selalunya dijemput untuk menarik perhatian umum supaya orang menonton siaran hiburan. Tetapi untuk rancangan agama tidak dipanggil guru-guru agama yang *top*, kadang-kadang guru-guru agama yang berceramah dalam televisyen, orang tidak kenal pun, *crew TV* sendiri pun tidak kenal siapa dia.

Jadi guru-guru agama yang tidak ada pengikut (*follower*), tidak bersifat *crowd puller* seperti yang ini diambil untuk berceramah agama di televisyen. Padahal ada penceramah-penceramah yang diminati, misalnya Ustaz Shamsuddin, mereka ini orang yang diminati tetapi jarang ataupun mereka tidak pernah dijemput untuk berceramah di televisyen.

Begitu juga pemimpin-pemimpin PAS. Misalnya Ustaz Nik Abdul Aziz Nik Mat, kalau melawat Timur Tengah diberi peluang untuk berceramah di TV di negara tersebut dan beliau diiktiraf sebagai seorang guru agama yang terkenal. Tetapi di Malaysia, orang seperti beliau tidak dipanggil untuk berceramah dalam televisyen.

Begitu juga Ustaz Abdul Hadi Awang. Kalau beliau pergi ke luar negeri akan terlihatlah gambarnya berceramah atau berkutbah di negeri-negeri Islam yang lain. Tetapi di Malaysia, orang-orang yang diminati untuk memberi kuliah atau ceramah agama tidak dipanggil langsung. Padahal siaran itu bukannya siaran terus menerus, hanya siaran rakaman. Kalau adegan-adegan ceramah Ustaz Hadi dan ustaz-ustaz yang lain itu didapati melanggar kehendak Kerajaan, hal-hal seperti itu boleh dipotong. Tetapi kita lihat pihak RTM mengambil

penceramah-penceramah agama yang tidak popular yang kita lihat tidak diminati langsung oleh orang ramai. Kita harap pihak RTM mengambil berat perkara ini supaya rancangan agama itu dapat diminati oleh anak-anak muda dan juga orang ramai.

Menjamin Kedudukan Tanah-tanah Wakaf Islam

(Dewan Rakyat, 30.1.91)

SAYA ingin merujuk kepada Program Pengurusan dan Perundangan Tanah, yang tujuannya ialah untuk mewujudkan perundangan yang seragam dan sistem tanah yang cekap bagi memenuhi kehendak pembangunan dan pengurusan tanah yang moden. Di antara aktiviti kemajuan pengurusan dan penyelidikan tanah termasuklah mengkaji, meminda dan membuat pembaharuan terhadap Kanun Tanah Negara dan undang-undang yang berkaitan dan penyelidikan ke atas dasar-dasar pembangunan dan undang-undang tanah.

Menjamin kedudukan tanah di antaranya termasuklah tanah-tanah wakaf yang dimiliki oleh orang Islam turun-temurun terutama sekali tanah-tanah wakaf yang berada di bandar-bandar. Misalnya, baru-baru ini berlaku kes Masjid Simpang Enam, Pulau Pinang di mana pihak swasta ingin memajukan tanah tersebut dan kes itu sekarang ini berlarutan hingga ke mahkamah.

Saya meminta Timbalan Menteri Tanah dalam mengemukakan pembaharuan terhadap Kanun Tanah Negara, perkara tanah wakaf ini hendaklah diambil berat supaya tanah-tanah wakaf ini dijamin berlangsungan terutama dari segi tujuan wakafnya itu tidak diselewengkan. Kita tahu bila orang hendak mengakad wakaf, ia akan sebut tanah itu sama ada ia akan digunakan untuk sekolah, masjid ataupun surau. Akad wakaf itu tidak boleh diubah begitu mudah, melainkan pihak penggubal undang-undang nanti berbincang dengan alim-ulama dalam perkara yang begini serius. Ia berlaku terutama di Pulau Pinang sekarang ini.

Sekarang ini kes tanah wakaf Masjid Simpang Enam, Pulau Pinang itu berada di Mahkamah Tinggi. Andainya kes ini dimenangi oleh pihak swasta, maka tanah wakaf di Simpang Enam yang ada masjid di atasnya itu akan jatuh ke tangan swasta dan tujuan asal wakaf untuk membina masjid akan terseleweng.

Kita perlu mengambil perhatian bahawa negara kita berada di dalam Komanwel. Sebarang keputusan dibuat berdasarkan kepada undang-undang yang digubal oleh Kerajaan, ia akan menjadi *precedence* kepada lain-lain negara yang berada di dalam Komanwel. Misalnya masjid-masjid di Singapura, Sri Lanka dan India kebanyakannya didirikan di atas tanah wakaf. Jadi, kes Mahkamah Tinggi Pulau Pinang nanti, sekiranya dimenangi oleh pihak swasta, maka ia akan menjadi bahan rujukan pihak Singapura, Sri Lanka dan India, misalnya, dalam usaha mereka untuk merampas tanah-tanah wakaf bagi digantikan dengan pusat-pusat perniagaan. Amat malang jika *precedence* keputusan mahkamah itu datangnya daripada

Malaysia.

Inilah yang perlu kita ambil perhatian dalam menggubal undang-undang Kanun Tanah Negara nanti supaya ia tidak menjadi satu *precedence* kepada negeri-negeri Komanwel yang lain terutama dalam negeri yang umat Islamnya minoriti, yang mana kebanyakannya sekolah-sekolah agama dan masjid berada di atas tanah wakaf.

Walaupun British telah memerintah negara kita begitu lama, satu perkara yang mereka tidak berani sentuh ialah masalah tanah wakaf kerana ia amat sensitif kepada umat Islam. Sebab itu sekalipun Pulau Pinang diperintah oleh British lebih awal dari negeri-negeri lain, ia tidak berani mengganggu tanah wakaf.

Kita harap usaha pihak swasta yang hendak mengambil tanah ini menjadi perhatian pihak Kementerian Tanah. Ia berlaku bukan sahaja di Pulau Pinang, tetapi juga di Kuala Lumpur, Ipoh, Melaka dan lain-lain bandar.

Seterusnya saya ingin menyentuh juga soal rampasan tanah wakaf Muassasah Darul Ulum, Kedah. Ini juga amat merbahaya kerana ia boleh jadi *precedent*. Sekarang ini kedudukan negeri-negeri misalnya Pulau Pinang tidak mustahil boleh jatuh ke tangan DAP sebagaimana Sabah jatuh ke tangan PBS. Dalam keadaan itu, kalau Kerajaan Negeri Kedah boleh merampas tanah-tanah wakaf, apa halnya nanti Kerajaan-kerajaan Negeri itu merampas tanah-tanah wakaf kepunyaan orang Islam, sedangkan *precedentnya* dibuat di negeri Kedah.

Perkara-perkara kepentingan umat Islam jangka panjang seperti ini hendaklah diambil perhatian betul-betul oleh pihak Kementerian Tanah, terutama di dalam mengkaji pembaharuan terhadap Kanun Tanah Negara. Kita berikan pandangan-pandangan ini sebab ada tuduhan-tuduhan mengatakan kalau DAP perintah, habis tanah wakaf. Ini ugutan-ugutan ataupun cerita-cerita yang dibuat menjelang pilihanraya. Sama ada benar atau tidak, ia tidak dapat dipastikan. Yang nyatanya, Kerajaan yang diketuai oleh orang Islam sendiri telah melakukannya sebelum DAP sempat memerintah lagi.

Jadi, dalam merangka hal-hal tanah wakaf ini, kepentingan umat Islam minoriti di mana-mana di negeri Komanwel hendaklah diambil perhatian dan Malaysia janganlah dijadikan *precedent*.

Hentikan Taktik Kotor Guna Jentera Kerajaan

(Dewan Rakyat, 31.1.1991)

PROGRAM Kemajuan Masyarakat dan Pelajaran Dewasa (Kemas) bertujuan meningkatkan taraf sosio-ekonomi rakyat melalui pembentukan masyarakat yang maju dan sejahtera sejajar dengan matlamat Dasar Ekonomi Baru.

Walaupun tujuan tersebut begitu baik sekali, tetapi apa yang jelas kepada kita bahawa jentera Kemas ini digunakan sepenuhnya dalam Pilihanraya untuk membantu jentera Barisan Nasional. Sebagai salah satu jentera Kerajaan yang terpenting, yang bertujuan untuk meningkatkan taraf sosio-ekonomi rakyat, saya menuduh dengan bukti-bukti yang ada bahawa BN menyalahgunakan jentera Kerajaan khususnya Kemas untuk kepentingan politik parti-parti Barisan Nasional.

Sebelum Pilihanraya Umum lalu, dalam satu taklimat yang disampaikan oleh Ketua Pengarah Kemas kepada petugas-petugas Kemas negeri, beliau menegaskan dalam kertas taklimat

Ketua Pengarah Kemas ini, di antaranya, *point* yang kedua saya ambil di sini :

“Kemas akan menyumbangkan tenaga kepada UMNO dalam pengumpulan data. Data-data tersebut akan dikemukakan kepada Timbalan Perdana Menteri dan digunakan di Bilik Gerakan Ibu Pejabat UMNO. Ketua Pengarah meminta semua anggota yang terlibat dalam mengumpulkan data supaya bekerja bersungguh-sungguh dan bertanggungjawab. Hasil data yang diperolehi mesti yang boleh dipercayai. Penglibatan Kemas dalam pengumpulan data ini adalah merupakan peluang yang baik bagi Kemas untuk menunjukkan kebolehan kepada Timbalan Perdana Menteri sendiri yang sudah mempunyai kepercayaan terhadap kredibiliti Kemas.”

Bahagian 5(1) dalam kertas ini-Kempen-yang berbunyi:

“Pengarah Kemas telah mengarahkan kepada ahli-ahli Kemas di seluruh negara. Kempen ini akan dilakukan oleh kumpulan pendesak seperti guru-guru, ustaz-ustaz dan persatuan-persatuan. Antara isu-isu penting yang diarahkan kepada Kemas ialah mengenangkan fakta kemenangan Barisan dalam Pilihanraya yang lepas, eksplorasikan kelemahan parti lawan, utarakan manifesto BN, utarakan bentuk ekonomi, sosial dan politik dan bacakan ataupun utarakan ucapan-ucapan pemimpin.”

Inilah taklimat Ketua Kemas Negara kepada ahli-ahli Kemas

seluruh negara untuk menjadikan peruntukan yang begitu banyak jutaan ringgit ini untuk menggerakkan jentera UMNO melawan parti-parti yang lain dalam Pilihanraya. Jadi, sudah tentulah UMNO yang telah kuat dan Barisan Nasional yang telah kuat mendapat peruntukan daripada Kemas yang begitu banyak.

Dalam kertaskerja yang disediakan oleh Timbalan Ketua Pengarah Kemas, Encik Mohd. Hosni Hussin pada 17.11.1989 bertajuk "Gerak Kerja Politik Dalam Kemas", diberi latar belakang penubuhan Kemas. Ia telah ditubuhkan bertujuan menukarkan sikap penduduk luar bandar dalam bidang pembangunan sosio-ekonomi dan juga dalam bidang politik. Jadi, di antara tugasnya yang diberi taklimat di sini ialah agar mereka dapat menukarkan pemikiran masyarakat Melayu supaya hanya menerima UMNO sebagai satu wadah Melayu untuk mereka perjuangkan di sudut politik. Jentera Kemas dikerahkan untuk menukarkan sikap penduduk luar bandar dalam bidang pembangunan ekonomi dan bidang politik. Selain itu, aspek terpenting Kemas diarah untuk membuat pengumpulan data politik, siapa sokong parti apa dan semata-mata untuk kemenangan BN.

Satu lagi bukti yang jelas bagaimana jentera Kemas digunakan sepenuhnya untuk Pilihanraya ada disini : "Operasi khas Kemas Pahang di Teruntum menjelang Pilhanraya Teruntum." Didedahkan di sini apa yang perlu dibuat oleh jentera Kemas termasuk kempen rumah ke rumah, memastikan supaya pihak Barisan Nasional dapat menang dalam Pilihanraya Kecil tersebut. Inilah peruntukan yang berjumlah begitu banyak - \$104,570,300. Sebahagian besarnya digunakan

untuk mengerahkan jentera Barisan Nasional dan jentera UMNO untuk mengumpul maklumat supaya bila berlaku Pilihanraya Kecil atau Pilihanraya Umum, data telah disediakan oleh pihak Kemas untuk jentera Barisan Nasional bergerak menuju sasaran. Sedangkan peruntukan ini datang daripada cukai yang dipungut daripada rakyat. Sudah tentulah kami dari Pembangkang melihat satu jentera Kerajaan yang digunakan hampir sepenuhnya untuk kemenangan Barisan Nasional ialah Kemas.

Kita harap taktik kotor seperti ini kalau tidak dihentikan dapat dikurangkan supaya pembayar cukai dapat merasai bahawa jentera Kerajaan seperti Polis, Tentera, Pejabat Pos, Telekom, LLN dan sebagainya itu bukan musuh mereka. Kita tidak merasakan mereka itu musuh kepada kita, tetapi jentera KEMAS , kami rasakan ianya musuh kami kerana bukti-bukti yang nyata mereka memang terlibat sepenuhnya untuk membantu jentera BN dan jentera UMNO dalam Pilihanraya.

